

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. He kōrero paki tēnei e pā ana ki ētahi o ngā painga o te whakamahi i te pūngao puia me te ngāwhā.

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou, me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Kātahi nei te mīharo o ngā puia me ngā wāhi ngāwhā. Matapakia te mōhio o ngā ākonga ki ēnei. Titiro ki te kōrero pūrākau mō Ngātoro-i-rangi. Mēnā ka āhei tētahi puia ki te kōrero, he aha pea tāna kōrero mō tōna ake hanganga.

Matapakia te take tērā tonu pea i huaina ai te puia i roto i te kōrero *Maunga Haunga*.

He Matapaki

Tirohia te pai o te pānui a te ākonga


I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini rīpene kōrero, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;



- ki te whakaharatau kia eke te ākonga ki tētahi atu taumata.

He whakapuaki māramatanga me ngā whakautu

1. I tīmata a Maunga Haunga i tētahi aha?
2. He aha ētahi o ngā whakamahinga o te pūngao puia me te ngāwhā?
3. Ko wai ētahi o ngā tuākana o Maunga Haunga?
4. He aha i noho kore whāwhā, kore ngāwhā, kore pahupahu, kore āwhā ai aua maunga?
5. Ki ōu whakaaro, he aha a Maunga Haunga i whakatakariri ai ki ōna hoa?

1. I tīmata a Maunga Haunga i tētahi puare pōharuharu.
2. Hei tao kai, hei tao hāngi, hei tae piupiu, hei whakaora tinana.
3. Ko Maungakiekie, ko Maungarei, ko Maungawhau, ko Rangitoto, ko Ōwairaka.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T Kia whakamahi i ētahi rerenga i roto i tētahi momo tuhituhi.

He whakatakinga ā-roto, he whakaharatau

I mua i te pānui i te kōrero, matapakia ngā kupu ka whakamahia pea ki te whakaahua i tētahi puia. Tirohia te papa kupu, ka matapaki ai i ētahi o ngā kupu tauwhāiti. Matapakia te hononga o aua kupu ki te āhua e tipu ake ai tēnei mea, te puia.

Kia oti i te ākonga te pukapuka te pānui, matapakia ētahi momo taketake i whakamahia ngā wāhi ngāwhā. Me tūhono ēnei kōrero ki ngā mahi pūtaiao.

Titiro ki te mahi huarite, te tāruatanga me te oro o ngā kupu. Matapakia ngā manawataki pērā i ērā kei roto i ngā karakia me ngā haka.